



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

11.09.2020թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի թիվ ՍՑ-ՆԳ-2020/210

Հայաստանի Հանրապետության գնումների հետ կապված բողոքներ քննող անձը՝ ի դեմս Գրիգոր Ներսիսյանի, ուսումնասիրելով Հայաստանի Հանրապետության ֆինանսների նախարարության 27.08.2020թ. թիվ 26/26-1/12909-2020 գրությամբ «ԲԱԶԱԼՏՇԻՆ» ԱԿ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեցի հետևյալը.

1. ՀՀ ֆինանսների նախարարության կողմից ներկայացված փաստերը և պահանջը.

ՀՀ ֆինանսների նախարարությունը ՀՀ քաղաքաշինության կոմիտեի 25.08.2020թ. թիվ 02/16.4/6627-2020 գրության հիման վրա 27.08.2020թ. թիվ 26/26-1/12909-2020 գրությամբ նախաձեռնել է «ԲԱԶԱԼՏՇԻՆ» ԱԿ-ին (հետայսու նաև՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

2. «ԲԱԶԱԼՏՇԻՆ» ԱԿ-ի կողմից ներկայացված փաստաթղթերը և դիրքորոշումը.

«ԲԱԶԱԼՏՇԻՆ» ԱԿ-ն Գնումների հետ կապված բողոքներ քննող անձին ուղղված գրությամբ հայտնել է հետևյալ դիրքորոշումը.

««ԲԱԶԱԼՏՇԻՆ» ԱԿ-ն մասնակցել է ՀՀ քաղաքաշինության կոմիտեի կողմից հայտարարված «ՀՀՔԿ-ԲՄԱՇՁԲ-20/7» ծածկագրով բաց մրցույթին և հրավերի պահանջներին համապատասխան ներկայացրել է հայտ:

Գնահատող հանձնաժողովն իր 13.08.2020թ. նիստում արձանագրել է անհամապատասխանություն «ԲԱԶԱԼՏՇԻՆ» ԱԿ-ի կողմից ներկայացված հայտում ներառված հավելված 1.1-ում ու ծավալաթերթում և մեզ առաջարկել հրավերով սահմանված ժամկետում շտկել արձանագրված անհամապատասխանությունները:

«ԲԱԶԱԼՏՇԻՆ» ԱԿ-ի կողմից սահմանված ժամկետում կատարվել են պահանջվող շտկումները: Ծավալաթերթի մեծ լինելու պատճառով շտկման աշխատանքը ձգվեց մինչև սահմանված ժամկետի՝ աշխատանքային օրվա (14.08.2020թ.) ժամը 23:00-ն:

Շտկված փաստաթղթերը գնահատող հանձնաժողովին ներկայացնելու պահին պարզվեց, որ ունենք էլեկտրոնային ստորագրության ժամկետի խնդիր, ինչի պատճառով ստիպված էինք վերոհիշյալ փաստաթղթերը գնահատող հանձնաժողովին ներկայացնել «ԲԱԶԱԼՏՇԻՆ» ԱԿ-ի կլոր կնիքով՝ ներկայացնելու համար սահմանված ժամկետը սպառվելուն մոտենալու հիմնավորմամբ:

17.08.2020թ. ժամը 01:30-ին արդեն վերացվել էր էլեկտրոնային ստորագրության ժամկետի խնդիրը: Նույն օրը ժամը 01:33-ին «ԲԱԶԱԼՏՇԻՆ» ԱԿ-ի կողմից գնահատող հանձնաժողովին է ներկայացվել շտկված փաստաթղթերի էլեկտրոնային ստորագրությամբ հաստատված օրինակներն ու բացատրություն՝ 14.08.2020թ. մեր կողմից ներկայացրած՝ շտկված փաստաթղթերը կլոր կնիքով հաստատելու մասին:

Գնահատող հանձնաժողովը իր 17.08.2020թ. ժամը 16:00-ի նիստում չի քննարկել մինչև նիստը մեր կողմից հանձնաժողովին ներկայացված գրությունը և հաշվի չի առել կլոր կնիքով հաստատված փաստաթղթերի՝ էլեկտրոնային ստորագրությամբ հաստատված օրինակները. հիմք՝ գնահատող հանձնաժողովի 17.08.2020թ. ժամը 16:00-ի նիստի արձանագրությունը:

Եթե գնահատող հանձնաժողովը քննարկեր մեր կողմից հանձնաժողովին ներկայացրած գրությունը և էլեկտրոնային ստորագրությունով հաստատված հավելված 1.1-ն ու ծավալաթերթը՝ գուցե այլ որոշում կայացներ. «Անբավարար» չգնահատեր և չմերժեր մեր կողմից ներկայացրած հայտը:

Հաշվի առնելով վերոգրյալը՝ «ԲԱԶԱԼՏՇԻՆ» ԱԿ-ն կարծում է, որ գնահատող հանձնաժողովը հնարավորություն ունեցել է մեր կողմից ներկայացված հայտը չմերժելու»:

Ընկերությունը, պատշաճ ծանուցված լինելով ՍՑ-ՆԳ-2020/210 ընթացակարգի շրջանակներում 11.09.2020թ. ժամը 10:40-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

3. ՀՀ քաղաքաշինության կոմիտեի կողմից ներկայացված փաստարկները և դիրքորոշումը.

ՀՀ քաղաքաշինության կոմիտեն (հետայսու նաև՝ Պատվիրատու) ՀՀ ֆինանսների նախարարությանն ուղղված 25.08.2020թ. թիվ 02/16.4/6627-2020 գրությամբ հայտնել է, որ ՀՀ քաղաքաշինության կոմիտեի կողմից 2020 թվականի հունիսի 19-ին հայտարարված «ՀՀԲԿ-ԲՄԱՇՁԲ-20/7» ծածկագրով ՀՀ Արագածոտնի մարզի Ծաղկահովիտի առողջության կենտրոնի կառուցման աշխատանքների ձեռքբերման գնման ընթացակարգին մասնակցության հայտ է ներկայացրել նաև «ԲԱԶԱԼՏՇԻՆ» արտադրական կոոպերատիվը:

ՀՀ կառավարության 2017 թվականի մայիսի 4-ի N 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 41-րդ կետի համաձայն՝ Ընկերությունը ծանուցվել է մեկ աշխատանքային օրվա ընթացքում ներկայացված հայտում արձանագրված անհամապատասխանությունները շտկելու վերաբերյալ:

Կարգի 32-րդ կետի 11-րդ ենթակետի և 42-րդ կետի համաձայն՝ Ընկերության հայտը մերժվել է:

Պատվիրատուն, պատշաճ ծանուցված լինելով ՍՑ-ՆԳ-2020/210 ընթացակարգի շրջանակներում 11.09.2020թ. ժամը 10:40-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

4. ՍՅ-ՆԳ-2020/210 ընթացակարգի քննության համար էական նշանակություն ունեցող փաստերը.

ՍՅ-ՆԳ-2020/210 ընթացակարգի քննության համար էական նշանակություն ունեն հետևյալ փաստերը.

1. ՀՀ քաղաքաշինության կոմիտեի կողմից հայտարարվել է «ՀՀՔԿ-ԲՄԱՇՁԲ-20/7» ծածկագրով բաց մրցույթ (հետայսու նաև՝ Ընթացակարգ), որին մասնակցելու նպատակով հայտ է ներկայացրել «ԲԱԶԱԼՏՇԻՆ» ԱԿ-ն:

2. Ընթացակարգի գնահատող հանձնաժողովի 17.08.2020թ. նիստի թիվ 2.4 արձանագրության համաձայն՝ «ԲԱԶԱԼՏՇԻՆ» ԱԿ-ի կողմից ներկայացված հայտը գնահատվել է անբավարար և մերժվել:

3. ՀՀ քաղաքաշինության կոմիտեն, ղեկավարվելով ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 45-րդ կետի դրույթով, Ընկերության տվյալները՝ համապատասխան հիմքերով, լիազոր մարմնին ներկայացրել է 25.08.2020թ. թիվ 02/16.4/6627-2020 գրությամբ:

5. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով ՀՀ ֆինանսների նախարարության 27.08.2020թ. թիվ 26/26-1/12909-2020 գրությունը, ՀՀ քաղաքաշինության կոմիտեի 25.08.2020թ. թիվ 02/16.4/6627-2020 գրությունը, հայտնում եմ հետևյալը.

«Գնումների մասին» ՀՀ օրենքի (հետայսու նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 45-րդ կետով սահմանվում է, որ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Այսպես, ՀՀ քաղաքաշինության կոմիտեի կողմից հայտարարվել է «ՀՀԲԿ-ԲՄԱՇՁԲ-20/7» ծածկագրով բաց մրցույթ, որին մասնակցելու նպատակով հայտ է ներկայացրել «ԲԱՋԱԼՏՇԻՆ» ԱԿ-ն:

Ընթացակարգի գնահատող հանձնաժողովի 13.08.2020թ. նիստի թիվ 2.2 արձանագրության համաձայն՝ «ԲԱՋԱԼՏՇԻՆ» ԱԿ-ի կողմից հայտով ներկայացված Հավելված 1.1-ում բացակայում է մասնակցի կողմից առաջարկվող սարքավորումների արտադրողների, մոդելների և տեխնիկական բնութագրերի վերաբերյալ տեղեկատվությունը, ինչպես նաև հայտով ներկայացված ծավալաթերթում

բացակայում են աշխատանքների բաժինների համար սահմանված նվազագույն և առավելագույն կշիռները:

Նույն արձանագրության համաձայն՝ Ընթացակարգի գնահատող հանձնաժողովը, հիմք ընդունելով Կարգի 41-րդ կետի պահանջները, որոշում է կայացրել նիստը մեկ աշխատանքային օրով կասեցնելու և մասնակցին արձանագրված անհամապատասխանությունները շտկելու վերաբերյալ ծանուցելու վերաբերյալ:

Ընթացակարգի գնահատող հանձնաժողովի 17.08.2020թ. նիստի թիվ 2.4 արձանագրության համաձայն՝ «ԲԱԶԱԼՏՇԻՆ» ԱԿ-ի կողմից ներկայացվել են շտկված փաստաթղթերը, սակայն դրանք հաստատված չեն էլեկտրոնային թվային ստորագրությամբ:

Նույն արձանագրության համաձայն՝ Ընթացակարգի գնահատող հանձնաժողովը, հիմք ընդունելով Կարգի 32-րդ կետի 11-րդ ենթակետի և 42-րդ կետի պահանջները, որոշում է կայացրել «ԲԱԶԱԼՏՇԻՆ» ԱԿ-ի կողմից ներկայացված հայտը անբավարար գնահատելու և մերժելու վերաբերյալ:

ՀՀ քաղաքաշինության կոմիտեն, ղեկավարվելով ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 45-րդ կետի դրույթով, Ընկերության տվյալները՝ համապատասխան հիմքերով, լիազորված մարմինն ներկայացրել է 25.08.2020թ. թիվ 02/16.4/6627-2020 գրությամբ:

Վերը նշված փաստերով պայմանավորված և հիմք ընդունելով «ՀՀՔԿ-ԲՄԱՇՁԲ-20/7» ծածկագրով ընթացակարգի գնահատող հանձնաժողովի 17.08.2020թ. նիստի թիվ 2.4 արձանագրությունը՝ Ընկերության հայտի մերժման վերաբերյալ՝ արձանագրում եմ, որ «ԲԱԶԱԼՏՇԻՆ» ԱԿ-ին գնումների գործընթացին մասնակցելու իրավունք չունեցող մասնակիցների ցուցակում ներառելու «Գնումների մասին» ՀՀ օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ են եկել 17.08.2020թ., սակայն Պատվիրատուն Ընկերության տվյալները՝ համապատասխան հիմքերով, գրավոր ուղարկել է լիազորված մարմին 25.08.2020թ., որի պայմաններում Պատվիրատուի կողմից խախտվել է Ընկերությանը գնումների գործընթացին մասնակցելու իրավունք չունեցող մասնակիցների ցուցակում ներառելու հիմքերը (այդ թվում՝ մասնակցի տվյալները) լիազորված մարմին ներկայացնելու Կարգի 45-րդ կետով սահմանված ժամկետը:

Այս տեսանկյունից հարկ եմ համարում արձանագրել հետևյալը.

«Նորմատիվ իրավական ակտերի մասին» ՀՀ օրենքի 41-րդ հոդվածի 1-ին մասի համաձայն՝ նորմատիվ իրավական ակտի նորմը մեկնաբանվում է՝ հաշվի առնելով նորմատիվ իրավական ակտն ընդունելիս այն ընդունող մարմնի նպատակը՝ ելնելով դրանում պարունակվող բառերի և արտահայտությունների տառացի նշանակությունից, ամբողջ հոդվածի, գլխի, բաժնի կարգավորման համատեքստից, այն նորմատիվ իրավական ակտի դրույթներից, ի կատարումը որի ընդունվել է այդ ակտը, տվյալ նորմատիվ իրավական ակտով սահմանված սկզբունքներից, իսկ այդպիսի սկզբունքներ սահմանված չլինելու դեպքում՝ տվյալ իրավահարաբերությունը կարգավորող իրավունքի ճյուղի սկզբունքներից:

«Գնումների մասին» ՀՀ օրենքի 2-րդ հոդվածի 1-ին մասի 23-րդ կետի համաձայն՝ գնման գործընթացը գնում կատարելու նպատակով գնումների մասին Հայաստանի Հանրապետության օրենսդրությամբ նախատեսված ընթացակարգերի, իրավունքների և պարտականությունների իրագործմանն ուղղված գործողությունների ամբողջություն է: Միաժամանակ գնումների գործընթացի կազմակերպման կարգը սահմանող ՀՀ կառավարության 05.04.2017թ. N 526-Ն որոշումը հստակ կարգավորում է գնման գործընթացի իրականացման կարգը՝ փուլ առ փուլ և ժամկետները:

Ընդ որում՝ համապատասխան ժամկետային սահմանափակումներ նախատեսելն ինքնանպատակ չէ և ուղղված է կամայականություններից խուսափելուն և գործողությունների ժամանակին իրականացնելուն, քանի որ յուրաքանչյուր դեպքում ուղղված է իրավունքների և պարտականությունների իրագործմանը:

Այսպիսով՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում մասնակցի տվյալները՝ համապատասխան հիմքերով, լիազորված մարմնին ուղարկելը Պատվիրատուի պարտականությունն է, այն իմպերատիվ դրույթ է, որի պահպանմամբ է միայն հնարավոր փաստել իրավահարաբերության առաջացումը:

Հակառակ դեպքում՝ Կարգի 45-րդ կետով սահմանված դրույթները չեն ծառայի իրենց նպատակին, այլակերպ մեկնաբանման դեպքում կհանգեցնեն որևէ ողջամիտ իրավական փաստարկով չհիմնավորվող մեկնաբանության՝ հաշվի չառնելով այն ընդունող մարմնի նպատակը, նորմում պարունակվող բառերի և արտահայտությունների տառացի նշանակությունը:

Այսպիսով՝ ժամկետային սահմանափակումները հետապնդում են իրավական որոշակիություն ապահովելու նպատակ որպես պետությունում իրավական որոշակիության և կայունության երաշխավորման միջոց:

Միաժամանակ ՀՀ Սահմանադրության 6-րդ հոդվածի համաձայն՝ պետական և տեղական ինքնակառավարման մարմիններն ու պաշտոնատար անձինք իրավասու են կատարելու միայն այնպիսի գործողություններ, որոնց համար լիազորված են Սահմանադրությամբ կամ օրենքներով:

ՀՀ սահմանադրական դատարանը 02.04.2014թ. կայացրած թիվ ՍԴՈ-1142 որոշմամբ իրավական որոշակիության սկզբունքի վերաբերյալ հայտնել է հետևյալ իրավական դիրքորոշումը. «Իրավական որոշակիության, իրավական անվտանգության և օրինական ակնկալիքների իրավունքի պաշտպանության սկզբունքները հանդիսանում են իրավական պետության ու իրավունքի գերակայության երաշխավորման անբաժանելի տարրերը: Սահմանադրական դատարանը 2006թ. ապրիլի 18-ի ՍԴՈ-630 որոշման մեջ, մասնավորապես, արձանագրել է, որ «... օրենքը պետք է համապատասխանի նաև Մարդու իրավունքների եվրոպական դատարանի մի շարք վճիռներում արտահայտված այն իրավական դիրքորոշմանը, համաձայն որի՝ որևէ իրավական նորմ չի կարող համարվել «օրենք», եթե այն չի համապատասխանում իրավական որոշակիության (*res judicata*) սկզբունքին, այսինքն՝ ձևակերպված չէ բավարար աստիճանի հստակությամբ, որը թույլ տա քաղաքացուն դրա հետ համատեղելու իր վարքագիծը»: Առավել ևս իրավունքի գերակայության սկզբունքի որդեգրման շրջանակներում օրենքում ամրագրված իրավակարգավորումները պետք է անձի համար կանխատեսելի դարձնեն իր իրավաչափ սպասելիքները: Բացի դրանից, իրավական որոշակիության սկզբունքը, լինելով իրավական պետության հիմնարար սկզբունքներից մեկը, ենթադրում է նաև, որ իրավահարաբերությունների բոլոր սուբյեկտների, այդ թվում՝ իշխանության կրողի գործողությունները պետք է լինեն կանխատեսելի ու իրավաչափ»:

Վերը հիշատակված իրավական նորմերի նման մեկնաբանությունը բխում է նաև իրավական ակտերի որոշակիության սկզբունքից, որն իրավական պետությունում գործող կարևորագույն սկզբունքներից մեկն է, իսկ Հայաստանի Հանրապետությունը, ինչպես հոչակված է ՀՀ Սահմանադրության թե՛ մինչև 25.12.2015թ. գործող

խմբագրությամբ, թե՛ ներկայումս գործող խմբագրությամբ 1-ին հոդվածով, իրավական պետություն է:

Վերոգրյալ իրավական նորմերի մեկնաբանության և սույն գործի փաստական հանգամանքների համադրման արդյունքում արձանագրում եմ, որ տվյալ դեպքում Պատվիրատուի կողմից չի պահպանվել Կարգի 45-րդ կետով սահմանված իմպերատիվ դրույթը՝ այն է հինգ աշխատանքային օր ժամկետը: Ընդ որում՝ օրենսդրությունը չի նախատեսում նշված ժամկետը վերականգնելու ինստիտուտը, հետևաբար, տվյալ դեպքում հինգ աշխատանքային օր ժամկետի խախտման հանգամանքները չեն դիտարկվում:

Նման պայմաններում գտնում եմ, որ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված պատասխանատվությունը չի կարող վրա հասնել և հանգեցնել «ԲԱԶԱԼՏՇԻՆ» ԱԿ-ին գնումների գործընթացին մասնակցելու իրավունք չունեցող մասնակիցների ցուցակում ներառելուն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

Ո Ր Ո Շ Ե Ց Ի

Հայաստանի Հանրապետության ֆինանսների նախարարության 27.08.2020թ. թիվ 26/26-1/12909-2020 գրությամբ «ԲԱԶԱԼՏՇԻՆ» ԱԿ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**Գնումների հետ կապված
բողոքներ քննող անձ՝**



ԳՐԻԳՈՐ ՆԵՐՍԻՍՅԱՆ